

TE KRISTO AE MAIU

AIA KOAUA ABOTORO

ANA EKARETIA IESU KRISTO IBUKIA AIKA ITIAKI NI BONG AIKA KAITIRA

Ni kauriangaan bungiaikin Iesu Kristo uoua te nga te ririki n nako, ti anga ara koaua ibukin koauani maiuna ae akea kabotauan kororaoina ma itiaikin Ana karea ni kamaiu ae korakora ae akea tokina. Akea temanna ae a tia ni korakora riki mwaakana n rotia aomata ni kabane ake a tia ni maeka ma ake a na manga maeka rimwi iaon te aba.

Boni ngaia ngkoa Iehova ae Korakora are n te O Tetemanti, ao te Meetia n te Nu Tetemanti. Iaan ana babaire Tamana, ao boni ngaia te tia karika aonnaba. “A bane ni karikaki bwaai Irouna; ao ngke tao akea Ngaia ao e aki karikaki te bwai teuana ae karikaki” (Ioane 1: 3). E ngae ngke akea ana bure, ma e bwabetioaki ni kakoroa bukin te raoiroi ni kabane. E “nakoako ni karaoa ae raoiroi” (Mwakuri 10:38), e ngae ngke e kakeaaki bonganaia iai. Ana euangkerio bon rongorongon te rau ao te kukurei. E kakoraa ni butiia aomata ni kabane bwa a na katotoonga arona. E nakonako inanon kawain Bwaretain, ni kamaiuia aoraki, ni kanorabaia aika a mataki, ao ni kautiia maate. E anga reirei iaon koauan nako te tai ae akea tokina, koauan maiura ngkoa imwain maekara iaon te aba, oini maiura iaon te aba, ao baika a kona ni karekei natin te Atua aika mwaane ao aine n te maiu ae na roko.

E moana karaoan te toa bwa kauriangaan Ana karea ni kamaiu ae kakannato. E kabureaki ao e kabuakakaaki ni bukinana aika a kaairua, e bukinanki bwa e bure bwa aonga ni kukurei taan iowa-wa nakoina, ao e motikaki taekana bwa e na mate iaon kaibangakin Korokota. E anga maiuna ni kamaiuia aomata ni kabane man aia bure. Bon te bwaintituaraoi ae korakora Ngaia are e anga ibukiia aomata ni kabane aika a na maeka iaon te aba.

Ti kaotioti ma nanora ni koaua bwa Maiuna, ae kairi rongo-rongoia aomata ni kabane, e aki moanaki i Betereem, ao e aki toki naba i Korokota. Boni ngaia ana Moannati te Tama, te Nati te Mwaane ae te Rikitemanna n te iriko, ae te Tia Kabooa aonnaba.

E uti man te mate bwa e na “riki bwa te moan uaa ibuakoaia aika matu” (1 I-Korinto 15:20). Ao ngkai te Uea ngaia ae a tia n uti man te mate, E kawariia aomata ake e tangiriia ngkoa inanon maiuna. E karaoi mwakuri n ibuobuoki naba nakoia Ana “tiibu tabemwaang” (Ioane 10:16) i Amerika ngkoa. N te aonnaba ae ngkai, e kaoti Ngaia ma Tamana nakon te ataainimwaane ae Iotebwa Timiti, ni moana “bongin rokon bwainin te euangkerio i aonnabai” are e a kaman tataekinaki n te berita (I-Ebeto 1:10).

Ni kaineti ma te Kristo ae Maiu, e korea ae kangai te Burabeti ae Iotebwa Timiti: “Matana ai aron uran te ai; iran atuuna e mainainana n ai aron te tino ae takaebuebu; e raneanea moana iaon raneanean taai; ao bwanaana kaanga ai aron tangin raanga n ran aika korakora, boni bwanaan Iehova ae kangai:

“Boni Ngai te moa ao te kabane; boni Ngai are e maiu, boni Ngai are e tiringaki; boni Ngai ami tia tei nakon te Tama” (T&B 110:3-4).

E taekina naba ae kangai te Burabeti ibukina: “Ao ngkai, imwiin koaua aika bati ake a tia n taekinaki ibukina, aio te koaua, ni kabaneana, are ti anga ibukina: Bwa e maiu!

“Bwa ti nooria, i angatain te Atua; ao ti ongo te bwanaa ae tataekina rongorongona bwa bon ti ngaia Ana Rikitemanna te Tama —

“Bwa mairouna, ao rinanona, ao irouna, are a karikaki iai aonnaba ngkai ao ngkekei, ao kaaia ake iai bon naati mwaane ao aine aika a karikaki iroun te Atua” (T&B 76:22-24).

Ti katanoataa n taeka aika ti bon nanon ni koaua bwa Nakoana n ibonga ao Ana Ekaretia a tia ni manga kaokaki nako aon te aba — ni “kateaki iaon aana ae. . . abotoro ma burabeti, ao Iesu Kristo naba are boni ngaia te atibu are bouan te maninginga ae moan te kakannato” (I-Ebeto 2:20).

Ti kakoaua bwa n te bong teuana ao e na manga oki nako aon te aba. “Ao e na kaotaki mimitongin te Uea, ao a na uaiia n nooria iriko ni kabane” (Itaia 40:5). E na tautaeaka bwa aia Kiing Kiing ao e na uea bwa aia Uea Uea, ao a na bane ni katorobubua bubuaniwae ao a na bane n tatakina neewe n taromaui i Matana. Ti na bane n tei ngaira n tatabemaniira nako bwa a na motikaki taekara Irouna n aron ara mwakuri ao ni baike a bane nanora iai.

Ti anga te koaua, Ngaira Ana Abotoro aika ti a tia ni katabuaki raoi - - - bwa Iesu bon te Kristo ae maiu, ae Natin te Atua ae aki manga mate. Boni ngaia te Kiing ae Emanuera ae kakannato, ae e tei n te bong aei i angatain Tamana. Boni ngaia te oota, te maiu, ao ana kaantaninga te aonnaba. Kawaina bon te kawai ae waaki nakon te kukurei n te maiu aei ao n te maiu ae akea tokina n te aonnaba ae na roko. E na kaaitauaki te Atua ibukin ana bwaintituaraoi ae akea kabotauan kororaoina ae Natina te Mwaane ae Tabu.

TE MOAN BERETITENTII

Thomas Mangan
James H. Fara

Tianuare 1, 2000

TE KOORAM N TE TENGAUN MA UOMAN

Boyd H. Jackson
James H. Fara
James H. Fara
Neal A. Tinsell
Russell M. Nelson
Dellin A. Oaks

M. Russell Ballard
Joseph B. Wirthlin
Richard G. Scott
Robert D. Hales
Jeffrey R. Holland
Henry A. Eyring